

1267-1267- OFP - Acta Capitulum Generalium apud Bononie Celebrati

In nomine patris et filii et spiritus sancti. Amen.

Acta Capituli Generalis Bononie Celebrati

Anno Domini · M° · CC° · LXVII° ·

Confirmamus has constituciones. In capitulo de sollempni celebratione capituli. post illud. de consilio respondeatur. addatur. perlectis autem litteris. et facta recommendacione vivorum. dicatur psalmus. ad te levavi. kyrie eleison. pater noster. cum versu. salvos fac. et oracione. pretende. Et hec habet · iii · capitula.

Item hanc. In capitulo de predicatoribus. post illud. infra · xxv · annos. addatur. nec predicet populo. nec confessiones extraneorum audiat. sine licencia prioris sui in capitulo de consilio discretorum sibi data. Et hec habet · iii · capitula.

Approbamus has. In capitulo de electione magistri. ubi dicitur. veniat ad capitulum generale. addatur. si vero in aliqua provincia provinciale capitulum fuerit celebratum. et in proximo festo penthecostes electio magistri fuerit facienda. diffinitor capituli generalis. et socius eius. sint illo anno. magistri ordinis electores. In anno autem priorum provincialium; duo de diffinitoribus immediate precedentis capituli provincialis. qui primitus habitum nostri ordinis susceperunt. ad electionem magistri ordinis admittantur. quorum anti-quior in ordine sit illo anno generalis capituli diffinitor. qui si ad capitulum non venerit. aut precedentis capituli extiterit diffinitor; tunc ad diffinicionem alius admittatur. Et hec habet · ii · capitula.

Item hanc. In capitulo de ieiuniis. post illud. ab ecclesia institutis. addatur. quando festum habens vigiliam. in qua secundum ordinem ieiunandum est. evenerit in secunda feria. eius vigilia in precedenti sabbato ieiunetur. contraria consuetudine non obstante. Et hec habet · ii · capitula.

Item. In eodem capitulo post illud. ab ecclesia institutis. addatur. et sextis feriis intus. et extra. Et hec habet · ii · capitula.

Inchoamus has. In capitulo de electione prioris conventualis. ubi dicitur. sicut in electione magistri. addatur. cum vero in aliquo conventu prioris electio fuerit facienda. non teneantur expectare vel vocare fratres vocem in electione habentes. nisi illos quos infra terminos sue predicacionis noverint constitutos. Conventibus autem quorum priores absolvuntur in capitulo provinciali. provideatur in eodem provinciali capitulo de prioribus. per priorem provincialem. vel eius vicarium. et diffinitores capituli provincialis. Idem dicimus de conventibus illius provincie. in qua generale capitulum celebratur. quorum priores per diffinitores generalis capituli fuerint absoluti.

Item hanc. In capitulo de graviore culpa. ubi dicitur. de conspiratoribus. nec eis aliqua obediencia iniungatur. addatur. nisi per magistrum ordinis. vel diffinitores generalis vel provincialis capituli fuerint restituti.

Item hanc. In capitulo de domibus concedendis. ubi dicitur. curam predictarum non recipiat. nisi per tria capitula fuerit approbatum. addatur. vel nisi per dominum papam. ordini committatur.

Item hanc. In capitulo de capitulo provinciali. ubi dicitur. alias sententia plurium prevalebit. addatur. si autem per adiunctionem vel absenciam prioris provincialis. vel eius vicarii. vel casu aliquo contingente. partes fiant equales; unus ab eisdem eligatur. et in quorum partem ille declinaverit; illorum sententia prevalebit.

Item hanc. In capitulo de capitulo generali. ubi dicitur. diffinitores itaque predicti. addatur. postquam fuerint accusati. quando eis videbitur expedire. excessum corrigant etc.

Item. In eodem capitulo ubi dicitur. et diffinitores audiant accusantes. addatur. auditis vero accusacionibus. secedat. ut eo absente diffinitores de eius correctione conferant et disponant.

Item hanc. In capitulo de capitulo generali. ubi dicitur. deinde culpe audiantur. addatur. nullus preter illos qui ad capitulum pertinent. veniat ad capitulum generale. sine licencia magistri. vel sui prioris provincialis licencia speciali.

Item hanc. In eodem capitulo. ubi dicitur. si vero magistrum aliqua occasione abesse contigerit. deleatur quod sequitur usque ibi. isti autem. etc. et dicatur sic. unus de diffinitoribus eiusdem capituli. ab ipsis diffinitoribus. vel maiori parte ipsorum. assumatur in magistri vicarium. qui durante capitulo. vicem magistri gerat in omnibus dumtaxat que ad tractatum et acta capituli pertinebunt. sed extra capitulum locum suum teneat. et in diffinicionibus unam tantum vocem habeat. Quod si in eius assumptione. in partes equales se diviserint. unus de presentibus fratribus eligatur ab ipsis. et ille pro vicario habeatur; in quorum sententiam iste declinabit. cum quo vicario ceteri diffinitores in diffinicionem procedant. Quod si in ipsa diffinicionem iterum in partes equales se diviserint; forma superius posita teneatur.

Committimus magistro ordinationem. tam studii Parisiensis. quam aliorum studiorum generalium · iiiior · provincialiarum. ut de ipsis. in magistris et bacallariis. et in aliis ad studium pertinentibus; curam habeat diligentem.

Damus licenciam fratribus faciendi octavas; in festis patronorum ecclesiarum suarum. Iste sunt admoniciones.

Admonemus quod fratres qui mittuntur ad curiam. vel morantur ibidem. non intromittant se de aliis negociis. quam de illis ad que mittuntur. vel de pertinentibus ad ordinem. et secundum consilium et assensum procuratoris ordinis generalis.

Item. Prior provincialis Romane provincie. diligenter provideat. ut conventus. ubi curia fuerit. fratres ydoneos habeat secundum exigenciam curie. priorem specialiter et lectorem.

Item. Provideant diffinitores capituli generalis qui pro tempore fuerint. ut feria · iiiia · ante penthecostem sint presentes omnes in loco capituli celebrandi.

Item. Peticiones que mittuntur a capitulis provincialibus ad capitulum generale. sigillentur sigillis diffinitorum capituli provincialis. et diffinitores et eorum socii euntes ad capitulum generale. eorumdem diffinitorum provincialis capituli sigillis munitas testimoniales litteras secum ferant.

Item. Priores provinciales et conventuales absoluti per generale vel provinciale capitulum. non resumantur ad eadem officia illo anno. in eadem provincia vel conventu.

Item. Admonemus et mandamus. ut sentencie late per iudices generalis vel provincialis capituli super limitationibus et aliis questionibus penitus observentur. Prioribus quoque provincialibus districte iniungimus. ut eas diligencius faciant observari.

Item. Priores provinciales constitutionem de suis provinciis per se vel per alios visitandis; curent diligencius observari.

Item. In singulis conventibus tres depositarii per conventum ponantur. qui sine licencia prioris vel vicarii. vel prior. vel vicarius sine ipsis. recipiendi deposita. eciam si necessitas poposcerit. non habeant facultatem. ab iisdem insuper sigillum conventus in archa depositorum cum diligencia conservetur.

Item. Fratres notabiliter iuvenes non faciant priores promoveri ad sacerdocium. nec promotos ad audiendas confessiones exponant. neque in primis missis de rebus sibi concessis. vel de questu. notabiles pictancias facere permittant.

Item. Curent priores provinciales mittere novicios ad conventus. in quibus in moribus. devocione. et religione. possint commodius instrui. et melius informari.

Item. Magister ordinis de assensu diffinitorum interdicat prioribus conventualibus. et fratribus universis. ne aliquem in aliqua religione professum. ad ordinem nostrum recipiant. sine suorum priorum provincialium licencia speciali. qui autem contra fecerint. ipso facto. potestate recipiendi novicios sint privati. quousque cum eis per magistrum ordinis. vel provinciale capitulum fuerit dispensatum.

Concedimus provincie Francie · i · domum.

Item. Provincie Lombardie · i ·

Item. Provincie Theotonie · i ·

Item. Provincie Dacie · i · dummodo sine gravibus condicionibus recipiantur. et sine preiudicio aliarum provinciarum.

Prioribus. qui dederunt licenciam fratribus veniendi ad capitulum sine causa sufficienti. iniungimus · iii · dies in pane et aqua · iii · psalteria · iii · disciplinas.

Ista sunt suffragia.

Pro domino papa. et statu universalis ecclesie. etc.

Absolvimus priores provinciales; Francie. Lombardie; Terre sancte.

Item. Absolvimus priores; Sundensem de provincia Theutonie. et Gripsvaldensem de provincia Polonie. propter scandala facta ab ipsis et fratribus eorum in civitate Gripsvaldensi. coram religiosis publice. occasione questus. et volumus quod non possint eligi. vel assumi ad officium prioratus. vel supprioratus. aut diffinicionis. seu visitacionis. nisi per magistrum ordinis cum eisdem fuerit dispensatum.

Insuper priori Sundensi predicto. iniungimus · xii · dies in pane et aqua · xii · psalteria; et totidem disciplinas.

Gripsvaldensi autem · xv · dies. totidem psalteria; et totidem disciplinas. et removemus eos de conventibus suis. ut ponantur in remotioribus partibus provinciarum suarum non reversuri ad dictos conventus vel partes illis conventibus propinquas; nisi de licencia magistri ordinis speciali.

Item. Fratri Iohanni de Brema. propter eadem scandala. de quibus culpabilis est. · xii · dies in pane et aqua. totidem psalteria; et totidem disciplinas. et removemus eum de conventu et terra sua. sicut de aliis est expressum.

Sentencias iudicum generalis capituli confirmamus.

Sequens capitulum generale. assignamus in provincia Romana; apud Pisas.

Actis additae sunt litterae Clementis quarti; cf. POTTHAST n. 20022; et litterae magistri ordinis; cf. app. n. XVIII.